



REPUBLIKA E KOSOVËS / REPUBLIKA KOSOVA

K.DH.SH.II.nr.388/24

GJYKATA KOMERCIALE E KOSOVËS – Dhomat e Shkallës së Dytë, në kolegjin e përbërë nga gjyqtarët: Krenar Berisha kryetar, Dren Rogova dhe Ramush Bardiqi, anëtarë, në konfliktin administrativ të paditësit-propozuesit, Albi Commerce shpk me seli në Prishtinë të cilin sipas autorizimit e përfaqëson Shoqëria e avokatëve “Kërveshi&Partners” në Prishtinë, kundër të paditurës Administrata Tatimore e Kosovës në Prishtinë, me bazë juridike, anulim vendimi, me kërkesë për shtyrjen e ekzekutimit të njëjtit, duke vendosur lidhur me ankesën e propozuesit-paditësit, të ushtruar kundër Aktvendimit të Gjykatës Komerciale-Dhomat e shkallës së parë, Departamenti Fiskal, KF.nr.731/2023 të datës 10.01.2024, në seancën e kolegjit të mbajtur me datë 13.02.2024, merr këtë:

A K T V E N D I M

Refuzohet si e pabazuar ankesa e propozuesit-paditësit Albi Commerce shpk me seli në Prishtinë, ndërsa Aktvendimi i Gjykatës Komerciale - Dhomat e shkallës së parë, Departamenti Fiskal, KF.nr.731/2023 i datës 10.01.2024, Vërtetohet

A r s y e t i m i

Me Aktvendimin e ankimuar të Gjykatës Komerciale-Dhomat e shkallës së parë, Departamenti Fiskal, KF.nr.731/2023 të datës 10.01.20234 është Refuzuar propozimi-kërkesa e paditësit-propozuesit Albi Commerce shpk me seli në Prishtinë, me të cilën ka kërkuar shtyrjen e ekzekutimit të aktit administrativ përfundimtar-vendimit nr.protok.493/23 datës 15.12.2023 të paditurit Administrata Tatimore e Kosovës në Prishtinë.

Kundër këtij aktvendimi ka ushtruar ankesë përfaqësuesi i autorizuar i paditësit - propozuesit, me të cilën e ka kundërshtuar ligjshmërinë e të njëjtit, për shkak të vërtetimit të gabuar dhe jo të plotë të gjendjes faktike, dhe zbatimit të gabuar të së drejtës materiale, duke i propozuar gjykatës që aktvendimi i atakuar të ndryshohet dhe të aprovohet në tërësi propozimi për shtyrjen e ekzekutimit të vendimit të ATK-së nr.protok.493/23 datës 15.12.2023 si e bazuar, ose që i njëjti aktvendim të priset dhe çështja ti kthehet gjykatës së shkallës së parë për rigjykim.

Dhomat e Shkallës së Dytë e Gjykatës Komerciale të Kosovës, shqyrtoi shkresat e lëndës, aktvendimin e ankimuar, pretendimet ankimore, dhe pas vlerësimit të tyre në kuptim të nenit 12 të Ligjit 08/L-015, dhe nenit 49 të LKA-së, ka gjetur se:

Ankesa është e pabazuar

Duke shqyrtuar shkresat e lëndës, aktvendimin e kundërshtuar sipas ankesës së propozuesit-paditësit, Kolegji i Dhomës së shkallës së dytë gjen se dhoma e shkallës së parë, pas shqyrtimit të propozimit të paditësit, për shtyrjen e ekzekutimit të vendimit të paditurit nr.protok.493/23 datës 15.12.2023, ka Refuzuar propozimin për shtyrje të ekzekutimit të këtij akti administrativ përfundimtar, me arsyetimin se paditësi në kontekst të argumentuarit nuk ka ofruar asnjë provë apo dëshmi të cilat do të mbështesnin pretendimin e paditësit se ekziston mundësia e shkaktimit të dëmeve apo humbjeve të tilla për të cilat arsye shtyrja e ekzekutimit është e domosdoshme. Propozuesi ka bashkangjitur si provë: vendimin kontestues, ankesën në ATK-ë, kontratën për sponsorizim, aneks kontratën, raportin narrativ, kontratën për sponsorizimin e Super ligës së Kosovës, transaksionin bankar lidhur me pagesën e sponsorizimit, të cilat dokumente në asnjë rrethanë nuk dëshmojnë se është përmbushur kushti i rrezikut serioz dhe dëmi i pariparueshëm siç është përcaktuar me nenin 22 të LKA-së.

Kolegji i Dhomës së Shkallës së Dytë, duke u nisur nga gjendja e tillë e çështjes, pranon në tërësi si të drejtë dhe të ligjshëm qëndrimin e tillë të dhomës së shkallës së parë, nga se edhe sipas vlerësimit të kolegjit, në rastin konkret nuk janë plotësuar në mënyrë kumulative kushtet për shtyrjen e ekzekutimit të aktit administrativ të paraparë në nenin 22 par.2 të Ligjit për Konfliktet Administrative.

Me këtë dispozitë juridike është paraparë që shtyrja mund të bëhet: nëse ekzekutimi i aktit administrativ do t'i sillte dëm paditësit, i cili vështirë do të riparohej, kurse shtyrja nuk është në kundërshtim me interesin publik, e as që shtyrja do ti sillte ndonjë dëm palës kundërshtarë përkatësisht personit të interesuar. Në rastin konkret propozuesi-paditësi, me propozimin e ushtruar në gjykatë me datën 29.12.2023, kërkon që të caktohet masa e përkohshme e sigurisë-shtyrja e ekzekutimit të vendimit të paditurit nr.protok.493/23 datës 15.12.2023, deri në vendosjen meritore të padisë lidhur me këtë lëndë.

Duke i marrë parasysh pretendimet ankimore të propozuesit- paditësit, në ankesë, ndaj aktvendimit të dhomës së shkallës së parë, Kolegji vlerëson se të njëjtat janë jo të vërtetuara, të pamjaftueshme dhe jo bindëse për tu aprovuar ankesa dhe për tu lejuar propozimi për shtyrjen e ekzekutimit të vendimit të atakuar deri në vendosjen sipas padisë së paditësit. Ngase edhe vlerësimi i Kolegjit është se nuk janë përmbushur kushtet ligjore për shtyrjen e ekzekutimit të vendimit të ankimuar, siç parashihet në nenin 22 par.2 të LKA-së.

Mbi këtë gjendje të fakteve, Kolegji gjen se dhoma e shkallës së parë, në mënyrë të drejtë ka vërtetuar gjendjen faktike dhe drejtë ka zbatuar dispozitat procedurale dhe materiale, me rastin e refuzimit të kërkesës së paditësit-propozuesit, me të cilën ka kërkuar shtyrjen

e ekzekutimit të vendimit të paditurit Administrata Tatimore e Kosovës në Prishtinë, dhe se nuk është cënuar ligji në dëm të ankuesit, me rastin e refuzimit të propozimit për shtyrjen e ekzekutimit të vendimit të kundërshtuar. Kolegji i vlerësoi të pa mjaftueshme dokumentet e bashkangjitura në shkresat e lëndës, se me ekzekutimin e vendimit kontestues, paditësit do sillte dëm për shkak të pamundësisë financiare të detyrimeve të planifikuara bankare.

Sipas vlerësimit të Dhomave të shkallës së dytë, aktvendimi i atakuar i dhomës së shkallës së parë, është i qartë dhe i kuptueshëm, ndërsa në arsyetimin e tij janë dhënë arsye të mjaftueshme për faktet vendimtare të cilat i pranon edhe Dhomat e shkallës së dytë. Andaj, ankesa si e tillë refuzohet, ndërsa aktvendimi i ankimuar vërtetohet si i drejtë dhe i ligjshëm.

Nga të lartcekurat e në vështrim të nenit 12 të Ligjit 08/L-015 dhe nenit 49 të LKA-së, u vendos si në dispozitiv të këtij aktvendimi.

GJYKATA KOMERCIALE E KOSOVËS
Dhomat e Shkallës së Dytë
K.DH.SH.II.nr.388/24 datë 13.02.2024

Kryetari i Kolegjit
Krenar Berisha